

Una via

À misurà i ghjorni è cuntà i passi lazzi
Ch'aghju frustatu à pressu à tè
À tene a memoria da u stazzu à u palazzu
Mi sò scialbatu à pressu à tè

Chì ne senti tù fratellu caru caru
Di u tazzu nentru à mè?
Tù chì ne pensi amicu paru paru
Di u vezzu à collu à mè?

Ùn avia ch'è una via pè andacci
Una vita
Una vita solu una vita pè campacci
Una via

Aghju intesu u fragu, i fischacci
Ch'è tù mai ùn voli tace
À perde a memoria è tuppalla
Pianu pianu di bambace

□

Chì fanale verde o rossu vedi
Quando u locu l'ai in manu à tè?
Chì stangaghju apertu o chjosu credi
Quando in locu ti pensi ind'è tè?

Ùn avia ch'è una via pè andacci
Una vita
Una vita solu una vita pè campacci
Una via

Cum'è un tempu di dumane
Chì si campa oghje è avà
A storia dice quasi vera a verità
Cum'è un oddiu di dumane
Chì si campa à tempu avà
A vita ella face soia a verità

D'una via.